

### He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.

### He whakarāpopoto

Pānuihia te whakarāpopoto ki te ākonga. He kōrero tawhito tēnei. I taea e wai te wete te koti o te tama? I taea e Tāwhirimātea, e Tama-nui-te-rā rānei?



### He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou, me mahi rawa te papa kupu me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te tīmatanga ki te mutunga o te pānui.

He kōrero o neherā tēnei mō tētahi tauwhāinga. Matapakia ētahi atu kōrero paki e pā ana ki te tauwhāinga.

Kōrerorerotia a Tāwhirimātea me Tama-nui-te-rā. Kimihia ngā whakaaro o ngā ākonga ko wai te mea kaha ake o te tokorua nei, ā, he aha ai.

### He Matapaki

#### Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei;
  - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
  - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
  - te whakatenatena i te ākonga mō tana tiro ki mua i whakaputa ai ia i te wā o te whakataki.

#### Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini ripene kōrero, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

### He whakapuaki māramatanga me ngā whakautu

1. He aha te kaupapa i whakataetae ai a Tāwhirimātea rāua ko Tama-nui-te-rā?
2. He aha te wero i hoatu a Tama-nui-te-rā ki a Tāwhirimātea?
3. Ko wai i toa i te whakataetae?
4. Ki tōu whakaaro, i mōhio kē a Tama-nui-te-rā ko ia e toa? He aha koe i whakaaro pēnā ai?
5. He aha ētahi atu kōrero paki e mōhio ana koe kāore te tangata whakahihī o roto i toa ai?

1. Kia mōhio ai ko wai te mea tino kaha rawa o rāua.
2. Kia mōhio ai ko wai te mea tuatahi ki te wete i te koti o te tama.
3. Ko Tama-nui-te-rā i toa.
4. Ka rerekē ngā whakautu.
5. Ka rerekē ngā whakautu.

### He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

### Te pūtake

**T** He tīpako i ngā wāhanga matua o te paki.

#### He whakatakinga ā-roto, he whakaharatau

I mua i te pānui i te pukapuka, matapakia ngā āhuatanga rerekē o te rā me te hau. Mēnā ka tauwhāinga rāua, ki te ākonga, ko wai e toa? He aha ai?

Kei te tīmatanga ko te mātātaki, ka whai i muri mai ko te tauwhāinga, ā, i te mutunga ka toa tētahi. Nō te mea he kōrero tēnei mō tētahi tauwhāinga, ko ēnei wāhanga e toru kei roto. Kōrerorerotia.

Kia oti i te ākonga te pukapuka te pānui, matapakia āe rānei nā te kaha ake, nā te kakama ake rānei o Tama-nui-te-rā i a Tāwhirimātea i toa ai ia.

Whakarite kia tautuhi te ākonga i te wero, i ngā wāhanga rerekē o te tauwhāinga, i te putanga me te āhua o tā te kaituhi whakawehe i te kōrero ki roto i aua wāhanga.